



18. september 2009

Inatsisartut Forretningsorden-iani § 36 imm. 1 tunngavigalugu Naalackersuisunut apeqquteqaatit makkua, Meeqqat Pisinnaatitaaffii pillugit FN-ip Isumaqatigiissusiaanut tunngasut apeqquteqaatiginiarpakka:

Meeqqat Pisinnaatitaaffii pillugit FN-ip Isumaqatigiissusiaata ukiunik 20-nngortorsiornissaanut Naalackersuisut malunnartitsiniarpat?
(Inatsisartunut ilaasortaq Anda Uldum, Demokraatit)

Tunngavilersuut:

Nunat avannarliit siunnersuisoqatigiiffianni, Nordisk Råd-imi, sulinera aqqutigalugu paa-sinikuuara, Meeqqat Pisinnaatitaaffii pillugit FN-ip Isumaqatigiissusiaata ukiunik 20-inngortorsiornissaanut atatillugu nunani avannarlerni arlalinni assigiinngitsutigut malunnartitsisoqarniarloq.

Meeqqat Pisinnaatitaaffii pillugit FN-ip Isumaqatigiissusiaa pisussaaffeqartitsivoq, Naalackersuisunilu Kalaallilu Nunaanni kommuneni meeqqanut inuusuttunullu politikkeqarnermut ilanngunneqartussaallutik.

Nalunngilara Namminersornerulernerup nalaani, kiisalu kingusinnerusukkut Namminersulivinnerup eqqunneqarnerani, nalliuttorsiortoqartillugu ullorsiortoqartillugulu uteqqiatumik, ilungersortumik aammalu ersarissumik malunnartitsisoqarnissaanik pisariaqartitsisoqarnera. Piffissap ingerlanerani ullorsiornerpassuit nalliuttorsiornerpassuillu misiginkuuagut, assersuutigalugu politiikerit ukiunik akunnaatsunik inuuissioraangata, taakkua saniatigut Namminersornerulernerup eqqunneqarneranut atatillugu ullorsiornerit nalliuttorsiornerillu arlallit, minnerunngitsumillu kingullertigut Namminersulivinnerup eqqunneqarneranut atatillugu.

Politikkikkut soqutigaara paasissallugu, Naalackersuisut taakkununnga assigusumik iliuuseqarnissaminnik takorluuinersut Meeqqat Pisinnaatitaaffii pillugit Isumaqatigiissitaliap ukiunik 20-inngortorsiornera malunnartinniartigut, taamaalilluni isumaqatigiissitaliap atuutsinneqarnera inuiaqatigiinni kalaallini nukittorsarneqarnerusammat.

Taamatut oqaaseqarlunga kinguneqarluartumik akilluarneqarnissara qilanaaraara.